

REGULAMENTO DISCIPLINARIO da Federación Galega de Baloncesto (FEGABA)

REGULAMENTO DISCIPLINARIO

ÍNDICE

Artigos

CAPÍTULO PRIMEIRO:

Disposicións Xerais 1- 35

CAPÍTULO SEGUNDO:

Sección Primeira

Das infraccións ás Regras de Xogo 36-55

Normas xerais 36

SUBSECCIÓN PRIMEIRA

Das infraccións cometidas por xogadores/as. Adestradores/as, delegados/as, asistentes/as, auxiliares e directivos/as. E das sancións. 37-42

SUBSECCIÓN SEGUNDA

Das faltas cometidas por compoñentes do equipo arbitral e auxiliares ou oficiais de mesa. E das sancións. 43-45

SUBSECCIÓN TERCEIRA

Das faltas cometidas por clubs, equipos deportivos, agrupacións, asociación ou entidades deportivas. 46-53

CAPÍTULO TERCEIRO:

Das infraccións ás Normas Xerais Deportivas e das Sancións. 54-59

CAPÍTULO CUARTO:

Do Procedemento

SECCIÓN PRIMEIRA

Disposicións xerais

60-65

SECCIÓN SEGUNDA

Subsección Primeira

Normas comúns.

66-70

Subsección Segunda

Procedemento ordinario.

71-77

Subsección Terceira

Procedemento extraordinario.

78-89

SECCIÓN TERCEIRA

Recursos

Dos recursos.

90-96

CAPÍTULO PRIMEIRO

Disposicións Xerais

Art. 1.- O exercicio de réxime disciplinario deportivo, no ámbito da práctica do baloncesto, regularase polo previsto na lexislación deportiva vixente, polo disposto nos Estatutos da Federación Galega de Baloncesto (FEGABA) e, fundamentalmente, polos preceptos contidos no presente Regulamento Disciplinario.

Subsidiariamente, serán de aplicacións as normas recollidas na Lei 39/2015, de 1 de outubro, de Procedemento Administrativo Común das Administracións Públicas.

Art. 2.- A potestade disciplinaria da FEGABA esténdese sobre todas as persoas que forman parte da súa estrutura orgánica; sobre os clubs ou equipos deportivos, agrupacións, asociacións ou entidades deportivas que a integran e os/as directivos/as das mesmas e o persoal que colabora ou traballa para eles/as; sobre xogadores/as, adestradores/as, árbitros/as, oficiais de mesa, delegados/as ou auxiliares de equipo ou delegados/as de campo de xogo; e, en xeral, sobre todas aquelas persoas e entidades que, estando federadas, practiquen baloncesto ou interveñan nos encontros dalgún xeito ou participen en competicións nas que a FEGABA interveña, incluso colaborando con outras entidades públicas ou privadas, na súa organización, ou sobre as persoas que organicen ou desenvolvan actividades técnicas ou deportivas relacionadas co baloncesto no ámbito da Comunidade Autónoma de Galicia en colaboración coa FEGABA.

Art. 3.- O ámbito material da potestade disciplinaria da FEGABA esténdese ás infraccións das regras de xogo ou das competicións, isto é, as accións e omisións que durante o curso do xogo ou competición vulneren, impidan ou perturbén o seu normal desenvolvemento, e que sexan cometidas con ocasión ou como consecuencia dos encontros ou eventos organizados por ela ou polas súas delegacións zonais, ou nos que participe ou interveña na organización, así como das infraccións das Normas Xerais Deportivas das persoas suxeitas á disciplina federativa cando actúen no ámbito competencia da FEGABA.

Art. 4.- A potestade disciplinaria da FEGABA, sen prexuízo das atribucións que ten o equipo arbitral no desenvolvemento dos propios encontros, correspóndelle ao Comité Galego de Competición e ao Comité Galego de Apelación.

A potestade disciplinaria deportiva atribúe aos seus titulares lexítimos as facultades de examinar, investigar e, no seu caso, sancionar ou corrixir ás persoas ou as entidades sometidas á súa disciplina deportiva, no marco das súas competencias.

O Comité Galego de Competición, dentro do exercicio das súas competencias, poderá actuar de oficio ou a instancia de parte lexítima.

Art. 5.- De conformidade co disposto nos Estatutos da FEGABA constituirá falta toda infracción das normas contidas nos ditos estatutos, no presente Regulamento Disciplinario ou en calquera outra disposición ou norma ditada pola Federación.

Son infraccións ás regras de competición as accións ou omisións que, durante o curso da competición ou os seus encontros, vulneren, impidan ou perturban o seu normal desenvolvemento, e ás normas xerais deportivas as demais accións ou omisións que sexan contrarias ao disposto nos Estatutos, nos Regulamentos de Organización, no presente Regulamento, Bases de Competición, Regras Oficiais de Xogo ou en calquera outra disposición de carácter deportivo que os complementen ou desenvolvan, sempre que aquela estea prevista e recollida como tal en ditas normas ou disposicións.

Art. 6.- En ningún caso poderán ser sancionadas as accións ou omisións non tipificadas como falta ou infracción en calquera das normas ou disposicións ás que se refire o artigo anterior.

Art. 7.- Non poderá impoñerse ningunha sanción que non se atope regulamentariamente establecida con anterioridade á comisión da falta correspondente. Non obstante, as disposicións disciplinarias terán efecto retroactivo en canto favorezan aos inculpadados, aínda que ao publicarse aquelas recaese resolución firme, sempre que non se rematase de cumprir a sanción.

Art. 8.- As faltas de carácter deportivo poden ser MOI GRAVES, GRAVES, MENOS GRAVES ou LEVES.

Art. 9.- As sancións teñen carácter educativo, preventivo e correctivo, e a súa imposición terá sempre como finalidade manter o interese xeral e o prestixio do deporte do baloncesto, así como a promoción de valores esenciais na sociedade como a igualdade, a inclusión, a participación, a ética e o xogo limpo, a competitividade razoable e ordenada, a mellora da saúde física, mental e social e a superación persoal.

Na aplicación das sancións terase en conta, principalmente, a intencionalidade do infractor e o resultado da acción ou omisión.

Art. 10.- As sancións que poidan impoñerse de acordo co presente regulamento, por razón das faltas ou infraccións nel previstas, son as seguintes:

A) A xogadores/as, adestradores/as, delegados/as de equipo e de campo, auxiliares de equipo, directivos/as, membros do equipo arbitral, oficiais de mesa e outras persoas que participen nos encontros:

- Inhabilitación.
- Suspensión.
- Amoestación pública.
- Apercibimento.
- Multa.
- Perda dos dereitos e gastos de arbitraje.

B) A clubs, equipos deportivos, agrupacións, asociacións ou entidades deportivas:

- Perda ou descenso de categoría.
- Clausura temporal do terreo de xogo.
- Realización da proba ou competición a porta pechada.
- Perda do encontro ou, de ser o caso, eliminatoria, ou descualificación da competición.
- Desconto de puntos na clasificación.
- Multa.
- Baixa na Federación.

Art. 11.- En ningún caso, salvo que se trate de clubs ou equipos deportivos, poderán impoñerse simultaneamente dúas sancións, agás cando unha delas sexa a de multa e se impoña como accesoria.

Art. 12.- Se dun mesmo feito, ou de feitos sucesivos, se derivasen dúas ou máis faltas ou infraccións, ou estas fosen cometidas nunha mesma unidade de acto, impoñerase a sanción correspondente á falta máis grave no seu grao máximo, ata o límite que represente a suma das que se puidesen impoñer ao sancionar separadamente ditas faltas. Neste caso, cando a sanción exceda deste límite, as faltas se sancionarán separada e individualmente.

Art. 13.- A suspensión pode ser por un número determinado de encontros, ou de xornadas ou por un período de tempo.

Art. 14.- A sanción de suspensión por un determinado número de encontros, xornadas ou tempo concreto implicará a prohibición de aliñarse ou intervir en tantos encontros ou xornadas oficiais ou tempo de suspensión como abrangue a sanción.

Os encontros ou xornadas ou tempo de suspensión serán inmediatos á data da resolución e seguirán a orde en que teñan lugar, aínda que por alteración do calendario, aprazamento ou suspensión dalgún encontro variase aquel.

O primeiro encontro ou xornada de aplicación da sanción será o inmediato á data da resolución, salvo suspensión da súa execución acordada polos órganos disciplinarios mediante resolución motivada.

Cando se lle impoña a sanción de suspensión por un número de encontros a un/a xogador/a de idade inferior á de sénior, terá que cumprir a sanción e comezará o prazo de cumprimento, en primeiro termo, na categoría na que foi sancionado/a ou na que ten subscrita licenza; e, si no hai xornada nesa categoría na posterior a imposición da sanción, e fora aliñado/a co equipo de categoría inmediata superior, ao menos en cinco xornadas anteriores na mesma tempada deportiva, poderán computarse como xornadas de cumprimento da sanción e cumprirse a mesma nas inmediatamente posteriores á resolución que estean programadas no calendario oficial das competicións en que fora aliñado con anterioridade e puidera aliñarse nesa xornada. Neste suposto, cando as xornadas coincidan no calendario contabilizarase para os efectos do cumprimento da sanción como unha soa xornada.

O previsto no parágrafo anterior seralles de aplicación aos adestradores/as e outras persoas que subscribisen licenza por dous ou mais equipos de acordo co establecido nas normas da FEGABA e no presente regulamento.

Art. 15.- Cando a sanción sexa por período de tempo non serán computables para o seu cumprimento os meses en que non se dispute competición oficial, salvo que a sanción se impoña a directivos/as.

Art. 16.- Cando o/a xogador/a, adestrador/a, delegado/a ou auxiliar de equipo sexa obxecto de expulsión ou figure na acta de xogo con falta ou técnica descualificante,

tramitarase o procedemento ordinario entendéndose concedido e iniciado o prazo do trámite de audiencia en relación cos feitos reflectidos na acta do encontro nese mesmo intre en que se pon en coñecemento do equipo ou club a acta. O mesmo efecto producirase por calquera outra incidencia recollida na acta ou, se hai informes posteriores, mediante a comunicación do contido destes documentos despois do encontro.

Art. 17.- Ao termo de cada tempada, o/a xogador/a, adestrador/a ou delegado/a suspendido/a poderá cambiar de club, si se dan as condicións para isto, pero os encontros ou xornadas ou tempo de suspensión que se atopasen pendentes cumpriranse nos termos previstos nos artigos do presente regulamento.

Art. 18.- Se a persoa suspendida non cumprixe a súa sanción dentro da tempada haberá de facelo na seguinte ou seguintes. Neste caso o tempo nelas computarase dende o momento en que comeza a competición en que participa ata aquel en que esta finalice, teña ou non licenza en vigor.

Tanto nun coma noutro caso a Federación reterá a licenza ata o cumprimento total da sanción, con independencia da clase ou categoría da nova licenza, se esta fose expedida.

Art. 19.- As sancións de suspensión ou inhabilitación incapacitan, non só na condición pola que foron impostas, senón tamén para o desenvolvemento de calquera outra actividade de carácter deportivo ou técnico relacionada co baloncesto durante o tempo de duración das mesmas.

Art. 20.- Cando o Comité de Competición ou Apelación acorden sancionar coa perda do encontro, o resultado deste será 2-0. Nos encontros de categorías Preminibakset, Minibasket, Pre-Infantil e Infantil este resultado será de 50-0.

No caso de eliminatoria, cando a puntuación final deba ser o resultado da obtida en dous partidos (ida e volta), o equipo que non compareza a un encontro perderá dita eliminatoria.

Art. 21.- A sanción de clausura dun terreo de xogo a un determinado club, equipo deportivo, agrupación, asociación ou entidade deportiva, implica a prohibición de utilizalo durante o período de tempo ou número de xornadas que abrangue a sanción imposta.

A sanción cumprirase nun campo de xogo nun Concello distinto ao do club ou equipo sancionado.

As bases de competición específicas poderán regular a súa adecuación ao disposto neste artigo.

Se un mesmo terreo de xogo é utilizado oficialmente por varios clubs ou equipos, a súa clausura só lles afectará ao club ou equipo sancionado ou aos encontros nos que estes fosen os organizadores.

Os gastos que por motivo da sanción de clausura do terreo de xogo se orixinen a terceiros serán asumidos polo club ou equipo sancionado.

A sanción de clausura do terreo de xogo poderá ser substituída polo Comité de Competición, de oficio ou por petición do club no prazo de 24 horas naturais contadas dende a comunicación da resolución, en atención ás circunstancias que concorran, pola de xogar sen asistencia de público a porta pechada. Neste caso, só poderán estar presente no pavillón en que se desenvolva o partido un máximo de corenta (40) persoas, incluídas xogadores/as, adestradores/as, delegados/as, auxiliares dos equipos, membros do equipo arbitral, auxiliares de mesa, directivos/as que acompañen aos equipos e persoal das instalacións. Todas estas persoas deberán estar debidamente acreditadas. A maiores, tamén poderán acudir os membros da prensa quen deberán estar en calquera caso acreditados. En ningún caso poderá estar presente ningunha outra persoa ou público. Neste suposto de partido a porta pechada a FEGABA designará un delegado federativo, cuxos gastos serán sufragados polo equipo sancionado.

Art. 22.- Os clubs, equipos deportivos, agrupacións, asociacións ou entidades deportivas son os directos responsables da boa orde e o normal desenvolvemento dos encontros e actividades deportivas e do comportamento dos xogadores/as, adestradores/as, delegados/as, auxiliares e demais persoas vinculadas a eles, incluídas as persoas seareiras dos equipos, independentemente do lugar de celebración do encontro.

En consecuencia, ademais das sancións económicas previstas no presente Regulamento para ditas persoas e das que será responsable subsidiario o club, poderá impoñérselle aos clubs unha multa de ata a mesma contía á que se lles impuxese ás anteditas persoas.

Art. 23.- Calquera sanción poderá levar aparellada, con carácter accesorio, unha multa económica de acordo á entidade da infracción e o suxeito responsable en base as contías referenciais seguintes:

- De 3 a 25 euros se o/a xogador/a é de categoría infantil ou cadete.
- De 25 a 50 euros se o/a xogador/a é de categoría júnior.
- De 50 a 100 euros se o/a xogador/a é de categoría sénior.
- Ata 100 euros se é asimilado a delegado/a de equipo ou auxiliar do mesmo.
- Ata 100 euros de é adestrador/a ou delegado/a de campo.
- Ata 150 euros se é directivo/a ou asimilado/a.

Ditas multas poderán impoñerse por cada xornada de sanción que corresponda, sen que, en ningún caso, poida exceder o total a cantidade de 500 euros.

En ningún caso se poderán impoñer multas económicas accesorias nas categorías Preminibasket e Minibasket nos supostos de non acudir aos encontros con menos xogadores dos esixidos.

Art. 24.- As sancións económicas aboaranse necesariamente á Federación que pertenza o Comité de Competición ou Apelación correspondente, dentro dos trinta días seguintes á notificación da resolución. Unha vez pasado este prazo, a cantidade que recolla a dita sanción sufrirá un incremento do vinte por cento.

As sancións económicas (excepto as que teñan que ver con impagos arbitrais), impostas con carácter principal ou accesorio, terán un desconto do 50% sempre que se aboen dentro dos sete días naturais contados dende o seguinte a recepción da sanción e sempre que renuncie a formular calquera tipo de recurso en relación a mesma.

Art. 25.- Os clubs, equipos deportivos, agrupacións, asociacións ou entidades deportivas serán sempre directa e solidariamente responsables das sancións pecuniarias impostas con carácter principal ou accesorio ás diferentes persoas pertencentes ou vinculadas aos mesmos, independentemente da súa relación, pero terán dereito a repercutir as contías impostas sempre que estas perciban remuneración polo seu labor.

Art. 26.- Poderáselles impoñer igualmente multa aos clubs, equipos deportivos, agrupacións, asociacións ou entidades deportivas por faltas cometidas por persoas

vinculadas directamente ou indirectamente a eles, incluídas as persoas seareiras dos equipos.

Art. 27.- Cando na disputa dun partido amigable se produzan feitos tipificados como de moi graves ou graves neste regulamento, de oficio ou por pedimento dunha das partes participantes, o órgano disciplinario federativo competente abrirá un expediente disciplinario e poderá impoñer as sancións que, de ser o caso, correspondan co mesmo tratamento que nun encontro oficial.

Art. 28.- Son circunstancias eximentes:

- A) O caso fortuíto.
- B) A forza maior.
- C) A lexítima defensa para evitar unha agresión.
- D) O estado de necesidade para evitar un mal propio ou alleo, sempre que o mal causado non sexa maior que o que se pretendía evitar.
- E) A realización da conduta en estado de enaxenación ou trastorno mental agás que fora buscado coa intención de cometer a infracción. Neste suposto o Comité de Competición poderá, en atención á súa incapacidade, acordar a suspensión da actividade do baloncesto mentres dure a súa situación.

Art. 29.- Son circunstancias atenuantes:

- A) As expresadas no artigo anterior cando non concorran todos os requisitos necesarios para aprecialas plenamente.
- B) A de preceder, inmediatamente á comisión da falta, provocación da persoa ofendida.
- C) A de proceder o responsable, por arrepentimento espontáneo, a reparar ou diminuír os efectos da falta, a dar satisfacción ao ofendido ou a confesar aquela aos órganos competentes.
- D) Non ter intención de causar un mal de tanta gravidade como o que se produciu.

Art. 30.- Son circunstancias agravantes:

- A) Ser reincidente. Hai reincidencia cando o autor da falta fose sancionado, con anterioridade ou no transcurso da mesma tempada, por calquera infracción á disciplina deportiva.

- B) Non acatar inmediatamente as decisións arbitrais, salvo que este desacato fose sancionado con infracción.
- C) Provocar o desenvolvemento anormal dun encontro pola infracción cometida.
- D) Cometer calquera falta como espectador, tendo licenza como xogador/a, adestrador/a, delegado/a, auxiliar de equipo, directivo/a, árbitro/a, oficial de mesa ou autoridade deportiva.
- E) Figurar na acta como capitán/a do equipo.
- F) Non abandonar a instalación deportiva cando é descualificado ou, de ser o caso, non permanecer no vestiario do seu equipo.
- G) Cando a falta ou infracción sexa contra un membro do equipo arbitral.
- H) As accións ou expresións que supoñan unha vulneración ou desconsideración do principio de igualdade ou impliquen unha discriminación por motivos racistas, antisemitas ou outra clase de discriminación referente á ideoloxía, relixión ou crenzas do ofendido, a etnia, raza ou nación á que pertenza, o seu sexo, idade, orientación ou identidade sexual ou de xénero, razóns de xénero, de aporofobia ou de exclusión social, a enfermidade que padeza ou a súa discapacidade.
- I) A extraordinaria transcendencia social ou deportiva da infracción.

Art. 31.- Cando non concorran circunstancias atenuantes nin agravantes, os Comités, tendo en conta a maior ou menor gravidade do feito, impondrá a sanción no grao que estime conveniente.

Cando se presten só circunstancias atenuantes aplicarase a sanción no seu grao mínimo e se unicamente concorren agravante ou agravantes, o grao medio ou máximo.

Cando se presenten circunstancias atenuantes e agravantes compensaranse racionalmente, segundo a súa entidade, para determinar a sanción.

Dentro dos límites de cada grao, correspóndelles aos órganos disciplinarios, atendendo á gravidade dos feitos e demais circunstancias concurrentes, a sanción que corresponda impoñer en cada caso.

Art. 32.- Na imposición das multas, os órganos disciplinarios federativos, atendendo aos feitos e circunstancias que concorran, fixarán a súa contía discrecionalmente ata o máximo establecido para cada suposto.

Art. 33.- Son responsables da infracción os que a leven a cabo directamente, os que forzan ou inducen directamente a outro a executala, os que cooperen á súa execución eficazmente ou os que podendo evitar a mesma non impidan a súa comisión.

Na apreciación das infraccións, as declaracións dos membros do equipo arbitral na acta ou en informes adxuntos presúmense certas, salvo error material manifesto. Así mesmo, as actas subscribas polos membros do equipo arbitral e, no seu caso, os informes anexos ampliatorios, constituirán medio documental relevante, co conxunto da proba, das infraccións imputadas.

Art. 34.- A responsabilidade disciplinaria extínguese:

- a) Por cumprimento da sanción.
- b) Por prescrición das infraccións.
- c) Por prescrición das sancións.
- d) Por falecemento do inculpado.
- e) Pola disolución do club, equipo deportivo, agrupación, asociación ou entidade deportiva sancionada.
- f) Pola perda da condición de deportista federado.

As infraccións prescribirán aos tres anos, ao ano, seis meses ou ao mes, segundo sexan, respectivamente, moi graves, graves, menos graves ou leves.

O prazo de prescrición comezará a contar ao día seguinte da comisión da infracción.

O prazo de prescrición interromperase pola iniciación do procedemento sancionador, pero se este permanecese paralizado durante un mes, por causa non imputable á persoa ou entidade suxeita ao dito procedemento, volverá correr o prazo correspondente. A prescrición interromperase de novo ao retomarse a tramitación do expediente.

As sancións prescribirán aos tres anos, ao ano, aos seis meses ou ao mes, segundo se trate das que correspondan a infraccións moi graves, graves, menos graves ou leves, respectivamente.

O prazo de prescrición das sancións comezará a contar dende o día seguinte a aquel en que adquira firmeza a resolución pola que se impuxo a sanción, ou dende que se quebrantase o seu cumprimento se este comezase.

Art. 35.- O réxime disciplinario regulado neste regulamento enténdese sen prexuízo da responsabilidade civil ou penal en que poidan incorrer as persoas físicas ou xurídicas enmarcadas no seu artigo segundo, así como do réxime derivado das relacións laborais, que se rexen pola lexislación que en cada caso corresponda.

CAPITULO SEGUNDO

Sección Primeira

DAS INFRACCIÓNS ÁS REGLAS DE XOGO

Normas xerais

Art. 36.- Son infraccións ás regras de xogo ou competición as accións ou omisións que durante o curso de xogo ou competición vulneren, impidan ou perturben o seu normal desenvolvemento.

Subsección Primeira

Das infraccións cometidas por xogadores/as, adestradores/as, delegados/as, asistentes/as auxiliares e directivos/as. E das sancións.

ART. 37- Considéranse infraccións MOI GRAVES, que serán sancionadas con suspensión de seis meses a catro anos e/ou multa de 500 a 3.000 euros:

A) A agresión física a un compoñente do equipo arbitral, oficial de mesa, directivo/a, dirixente/a deportivo/a, xogador/a, adestrador/a, delegado/a, auxiliar de equipo, espectador/a ou, en xeral, a calquera persoa, incluso do seu propio club ou equipo, cando aquela acción sexa violenta, grave e lesiva.

B) A realización de actos graves que provoquen a suspensión definitiva do encontro. En caso de reincidencia poderá castigarse con inhabilitación a perpetuidade aínda cando esta non se producise dentro da mesma tempada.

C) A alteración dun documento en algún dos seus elementos ou requisitos de carácter esencial.

D) Simular un documento, en todo ou en parte, de maneira que induza o erro sobre a súa autenticidade.

E) Supoñer nun acto a intervención de persoas que no tiveran participación, ou atribuír ás que interviñeron declaracións ou manifestacións diferentes das que fixeran.

Art. 38.- Consideraranse infraccións GRAVES que serán sancionadas con suspensión de un mes a dous anos ou con suspensión de tres a nove xornadas e/ou multa de 500 a 1.000 euros a agresión física a calquera persoa mencionada no artigo anterior, sempre que a acción pola súa gravidade non constituía a falta prevista no apartado A do artigo anterior.

Art. 39.- Consideraranse tamén infraccións GRAVES, que serán sancionadas con suspensión de un mes a un ano ou con suspensión de tres a nove xornadas e/ou multa de 100 a 500 euros:

A) A agresión física leve a calquera persoas comprendidas nos artigos anteriores, cando pola súa gravidade non constituía a falta tipificada nos artigos anteriores do presente regulamento.

B) Ameazar, coaccionar ou realizar actos vexatorios ou de burla de palabra ou de obra, contra calquera compoñente do equipo arbitral, oficial de mesa, directivo/a, dirixente/a deportivo/a, xogador/a, adestrador/a, delegado/a, auxiliar de equipo, espectador/a ou, en xeral, a calquera persoa, incluso do seu propio club ou equipo.

C) Insultar ou ofender, de forma grave ou reiterada, ás persoas indicadas no parágrafo anterior.

D) O intento de agresión ou a agresión non consumada a calquera das persoas indicadas no apartado B) deste artigo.

E) Empregar no transcurso do xogo, medios ou procedementos violentos que atenten á integridade doutro/a xogador/a, causándolle dano ou lesión.

F) O incumprimento reiterado de ordes emanadas dos árbitros.

Art. 40.- Consideraranse infraccións MENOS GRAVES que serán sancionadas con suspensión de unha a tres xornadas e/ou multa de ata 100 euros:

A) Ameazar, coaccionar, insultar ou realizar actos vexatorios ou de burla, de palabra ou obra, contra calquera membro do equipo arbitral, oficial de mesa, directivo/a, dirixente/a

deportivo/a, xogador/a, adestrador/a, delegado/a, auxiliar de equipo, espectador/a ou, en xeral, a calquera persoa, incluso do seu propio club ou equipo, cando non revistan a intensidade para ser catalogadas como graves.

B) Desobedecer as ordes ditadas polos árbitros durante o transcurso do encontro.

C) Empregar no transcurso do xogo, medios ou procedementos violentos que atenten á integridade doutro/a xogador/a, causándolle dano leve ou lesión leve.

D) Provocar ou incitar o público en contra da correcta marcha dun encontro.

E) Expresarse de forma atentatoria ao decoro debido ao público, e ofender a algún espectador con palabras ou xestos.

F) Dirixir o seu equipo dende as bancadas e outra zona da instalación deportiva aos adestradores/as que están suspendidos por sanción ou expulsados do encontro.

Art. 41.- Serán faltas LEVES, que serán sancionadas con apercibimento ou con suspensión de unha a tres xornadas:

A) Protestar de forma reiterada ou airada as decisións arbitrais.

B) Dirixirse aos membros do equipo arbitral, dirixente deportivo, técnico/a, delegado/a, oficial de mesa, adestrador/a, xogador/a ou calquera outra persoa que participe ou colabore nas encontros, incluso do seu propio club ou equipo, con expresións de menosprezo, ou cometer actos de desconsideración cara a eles.

C) Empregar no transcurso do xogo medios ou procedementos violentos que atenten contra a integridade doutro xogador, sen lle causar dano ou lesión.

D) Provocar a interrupción anormal dun encontro, ou ben entrar na cancha de xogo cando se está disputando o encontro, ou abandonar a zona de banco dos suplentes sen ser requirido para iso por algún membro do equipo arbitral.

E) O incumprimento por parte do delegado/a de campo das súas funcións como tal.

F) Formular observacións de forma desconsiderada a calquera membro do equipo arbitral.

G) Menosprezar de calquera maneira a autoridade ou a dignidade de calquera compoñente do equipo arbitral, dirixente deportivo, técnico/a, delegado/a, oficial de mesa, adestrador/a, xogador/a ou calquera outra persoa que participe ou colabore nas encontros, incluso do seu propio club ou equipo.

H) Cometer actos de desconsideración, ou ben dirixirse a calquera membro do equipo arbitral, dirixente deportivo, técnico/a, delegado/a, oficial de mesa, adestrador/a, xogador/a ou calquera outra persoa que participe ou colabore nas encontros, incluso do seu propio club ou equipo, con expresións ou xestos incorrectos ou antideportivos, e sempre que estes non constitúan unha falta máis grave.

- I) Redactar documentos irrelevantes que atenten contra a disciplina deportiva ou lle falten ao respecto aos comités e directivos federativos.
- J) A descualificación do/a adestrador/a por acumulación de técnicas sobre o/a mesmo/a.
- K) Adoptar unha actitude pasiva ou negligente no cumprimento das instrucións arbitrais.
- L) O incumprimento das súas obrigas reflectidas no Regulamento Xeral da FEGABA.

Art. 42.- Será tamén falta LEVE, que será sancionada con apercibimento ou con suspensión de unha a tres xornadas a conduta do/a xogador/a, adestrador/a, delegado/a ou asistente de equipo que non abandone a instalación deportiva ou non permaneza no seu vestiario cando sexa expulsado dun encontro por decisión arbitral.

Subsección Segunda

Das faltas cometidas por compoñentes do equipo arbitral e auxiliares ou oficiais de mesa. E das sancións.

Art. 43.- Consideraranse infraccións MOI GRAVES, que serán sancionadas con suspensión de un a catro anos, as seguintes:

- A) A agresión a calquera outro compoñente do equipo arbitral, oficial de mesa, directivo/a, dirixente/a deportivo/a, delegado/a, xogador/a, adestrador/a, espectador/a ou, en xeral, a calquera persoa que se atope, participe ou colabore nos encontros.
- B) A parcialidade probada cara a un dos equipos que altere ou modifique o resultado do encontro.
- C) A redacción, alteración ou manipulación da acta do encontro de forma que as súas anotacións non correspondan co acontecido no terreo de xogo, ou a información maliciosa ou falsa.

Ditas infraccións poderían, así mesmo, supoñer a perda da licenza federativa e a imposibilidade de solicitar a tramitación da mesma na tempada seguinte, así como a perda dos dereitos económicos que lle puideran corresponder.

Art. 44.- Consideraranse infraccións GRAVES, que se sancionarán con suspensión de un a doce meses, as seguintes:

- A) A negativa a cumprir as súas funcións nun encontro ou aducir causas falsas para evitar unha designación.

- B) A ausencia inxustificada a un encontro, cando motive a súa suspensión.
- C) Insultar, ameazar ou coaccionar a outro compoñente do equipo arbitral, oficial de mesa, directivo/a, dirixente/a deportivo/a, delegado/a, xogador/a, adestrador/a, espectador/a ou, en xeral, a calquera persoa que se atope, participe ou colabore nos encontros.
- D) O comportamento incorrecto e antideportivo que provoque a animosidade do público.
- E) Dirixir encontros amigables ou doutras competicións sen a correspondente autorización da FEGABA ou da delegación zonal á que lle corresponda a designación a través do seu Comité de Árbitros.
- F) Suspender un encontro sen a concorrencia das circunstancias previstas polo regulamento para iso.
- G) O incumprimento reiterado das súas obrigas.
- H) A non dispoñibilidade suficiente, de forma reiterada e sen motivación xustificada.

Nestes supostos poderase impoñer tamén a perda total ou parcial dos dereitos económicos que lle puideran corresponder.

No suposto F, cando o partido se retome, todos os gastos ocasionados por este feito serán asumidos polo Comité de Árbitros correspondente.

Art. 45.- Consideraranse infraccións LEVES, que serán sancionadas con apercibimento ou suspensión de unha a tres xornadas, as seguintes:

- A) Non presentarse no terreo de xogo perfectamente uniformado ou con antelación de vinte minutos antes do encontro.
- B) Calquera acto de desconsideración ou dirixirse a calquera persoa nos encontros con expresións ou ademáns incorrectos.
- C) A pasividade ante actividades antideportivas das persoas compoñentes dos equipos participantes.
- D) Cubrir de forma incompleta ou equivocada a acta ou non remitir esta, na forma e prazo establecidos regulamentariamente, ou remitila coa información defectuosa ou non facilitar os resultados na forma e prazos establecidos nas normas específicas para as competicións organizadas pola FEGABA ou nas que colabore a mesma.
- E) A falta de puntualidade a un encontro.
- F) A ausencia inxustificada a un encontro cando non motive a suspensión deste.
- G) O incumprimento puntual das súas obrigas.

- H) A falta de informe, cando lle corresponda realizalo ou sexa requirido para isto polo Comité de Competición sobre feitos acontecidos antes, durante ou despois dun encontro.
- I) A falta de cumprimento por un oficial de mesa das instrucións do árbitro principal.
- J) A non remisión da acta do encontro no prazo establecido, cando neste haxa incidentes.
- K) A non dispoñibilidade suficiente, de forma puntual e sen motivación xustificada.

Nestes supostos poderase impoñer tamén a perda total ou parcial dos dereitos económicos que lle puideran corresponder.

Subsección Terceira

As faltas cometidas polos clubs, equipos deportivos, agrupacións, asociacións ou entidades deportivas. E das sancións.

ART. 46.- Consideraranse infraccións MOI GRAVES, que serán sancionadas con multa de ata 1.000 euros, perda do encontro ou, de ser o caso, da eliminatoria, e desconto dun punto na clasificación xeral, sen prexuízo das indemnizacións que procedan, as seguintes:

- A) A ausencia a un encontro ou a negativa a participar nel, en ámbolos dous casos de forma inxustificada, por parte dun equipo do club.
- B) A retirada dun equipo do terreo de xogo unha vez comezado o encontro, impedindo que este se xogue por enteiro.
- C) A actitude incorrecta do equipo do club durante un encontro, se provoca a súa suspensión.
- D) O incumprimento por mala fe das normas referentes á dispoñibilidade dos terreos de xogo e ás condicións e elementos técnicos necesarios nestes, segundo as regras de xogo, cando motive a suspensión do encontro ou cando poña en perigo a integridade das persoas.
- E) A realización por parte do público seareiro do equipo, de xeito colectivo ou individual, de actos graves de agresións ou intentos de agresión, coacción, ameazas ou calquera outro tipo de violencia, antes do inicio ou durante o desenvolvemento ou unha vez rematado o encontro, contra compoñente do equipo arbitral, oficial de mesa, directivo/a, dirixente/a deportivo/a, delegado/a, xogador/a, adestrador/a, espectador/a ou, en xeral, a calquera persoa que se atope, participe ou colabore nos encontros, independente de onde se celebren, que impidan o normal inicio, desenvolvemento ou terminación do partido ou que leven á súa suspensión.

A reincidencia na conduta descrita nos apartados A, B e E poderá ser sancionada coa descualificación do equipo do club na competición en que participe, sen prexuízo das indemnizacións ás que houbera lugar. Non obstante, de ser a primeira vez e concorrer, a xuízo do Comité de Competición, circunstancias que así o aconsellasen, podería non ser descontado o punto da clasificación xeral.

Ademais das sancións previstas no presente artigo, nos supostos contemplados nos seus apartados C e D os órganos xurisdiccionais poderán apercibir de clausura e incluso acordar esta por un a seis encontros.

Art. 47.- Consideraranse infraccións GRAVES, que serán sancionadas con multa de ata 500 euros e perda do encontro ou, de ser o caso, da eliminatoria, as seguintes:

- A) A aliñación indebida dun xogador/a por non estar previsto da correspondente inscrición para o equipo ou categoría da competición e sen a autorización provisional xustificada de que a dita inscrición está en tramitación, ou por estar o/a xogador/a suspendido/a, ou por non estar inscrito/a na acta de xogo antes do inicio do encontro. E, así mesmo, a aliñación dun xogador/a nun encontro despois de ser eliminado/a ou descualificado/a, así como non dispor fidedignamente da carta de baixa ou da totalidade da documentación que se esixa na correspondente normativa e que deberá ser expedida polos órganos deportivos competentes.
- B) A falsidade na declaración de datos que resultasen fundamentais para a expedición da licenza dun xogador/a se este participase en competición oficial.
- C) A aliñación dun número inferior a cinco xogadores/as, ao inicio do encontro.
- D) O incumprimento das disposicións referentes aos terreos de xogo e elementos técnicos necesarios segundo as regras de xogo e bases de cada competición cando isto motive a suspensión do encontro.
- E) A participación en encontros amigables sen dispor da preceptiva autorización da federación correspondente.
- F) A ignición de petardos ou bengalas ou outros obxectos perigosos dentro do recinto deportivo, cando lles cause dano físico ás persoas asistentes.
- G) Nas categorías minibasket e preminibasket, a aliñación dun número de xogadores/as inferior ao esixido nas normas específicas da correspondente competición aínda que se trate de ambos equipos contendentes, así como a inobservancia das normas específicas de aliñación e participación de xogadores/as en cada partido.

H) A non presenza do adestrador/a ou dun delegado/a de equipo en partidos das categorías infantil, minibasket e preminibasket.

I) A vulneración de carácter grave de calquera outra norma de competición aprobada legal ou estatutariamente.

Art. 48.- Como excepción ao disposto no artigo anterior, se a aliñación indebida se producise sen concorrer mala fe, nin negligencia, disporase a anulación do encontro e a súa repetición, no caso de vitoria do equipo no que se dese o dito suposto. En dito caso, o/a xogador/a afectado/a non poderá aliñarse no encontro de repetición.

No suposto de se repetir o encontro, todos os gastos de arbitraje que se ocasionen con motivo desta repetición serán asumidos por aquel club, que deberá indemnizar, ademais, ao outro coa cantidade que sinalen os órganos disciplinarios federativos.

Art. 49.- Consideraranse tamén infraccións GRAVES, e sancionaranse con multa de ata 500 euros e poderase apercibir de clausura do terreo de xogo ou incluso acordar esta de un a seis encontros, as seguintes:

A) As incidencias do público en xeral e o lanzamento de obxectos ao terreo de xogo en particular, que perturben de forma grave ou reiterada o desenvolvemento do encontro, provoquen as suspensións transitorias deste ou atenten á integridade física dos asistentes. Se tales accións fosen causa de suspensión definitiva do encontro, terá a consideración de falta moi grave.

B) Os actos graves de desconsideración, insultos ou vexacións inxustas que o público seareiro dun equipo ou club, de forma individual ou colectiva, produza contra compoñente do equipo arbitral, oficial de mesa, directivo/a, dirixente/a deportivo/a, delegado/a, xogador/a, adestrador/a, espectador/a ou, en xeral, a calquera persoa que se atope, participe ou colabore nos encontros, independente de onde se celebren, antes ou durante ou despois do encontro e dentro do recinto deportivo ou nas inmediacións do mesmo.

C) Non adoptar todas as medidas de prevención necesarias para evitar alteracións da orde antes, durante e despois do encontro.

D) A conduta antideportiva das persoas que participen ou colaboren no encontro, cando provoquen a suspensión temporal do mesmo.

Art. 50.- Consideraranse infraccións LEVES que se sancionarán con multa de ata 300 euros:

- A) Os incidentes de público seareiro dun equipo ou club, de forma individual ou colectiva, que non teñan o carácter de grave ou de moi grave, independente de onde se celebre o encontro, antes ou durante ou despois do encontro e dentro do recinto deportivo ou nas inmediacións do mesmo.
- B) A falta de puntualidade dun equipo a un encontro cando non motive a súa suspensión, así como a non presentación con, cando menos, vinte minutos de antelación á hora de comezo do encontro da documentación total ou parcial dos compoñentes do equipo.
- C) O incumprimento das disposicións referentes aos terreos de xogo, condicións e elementos técnicos necesarios segundo as regras de xogo e bases de cada competición, cando non motiven a suspensión do encontro, así como a inobservancia no que respecta a vestiarios para árbitros e equipos visitantes. Neste suposto, cando haxa reincidencia, o órgano disciplinario federativo poderá suspender a utilización do terreo de xogo ou agardar polo informe do órgano ou entidade correspondente e, á vista deste, proceder á clausura daquel.
- D) A falta de designación dun delegado/a de campo.
- E) A actuación indebida do/a adestrador/a, xogador/a, delegado/a ou auxiliares de equipo, xa sexa por non estar provisto da correspondente inscrición para o equipo ou para a categoría da competición e sen a autorización provisional xustificativa de que a dita inscrición está en tramitación, ou por estar ditas persoas suspendidas.
- F) O lanzamento de obxectos ao terreo de xogo ou a realización de actos vexatorios por parte do público contra a autoridade arbitral ou membros dos equipos participantes, cando non teña especial gravidade.
- G) A actuación indebida ou falta de consideración por parte dun equipo cara ao conxunto arbitral, sen que se poida determinar a identidade dos infractores.
- H) A falta de informe por parte do club, cando o capitán dun dos seus equipos asine a acta baixo apelación.
- I) A falta de informe cando sexa requirido para iso polos órganos xurisdicionais da FEGABA.
- J) A rotura de obxectos ou estragos ocasionados polos membros dun equipo nas dependencias deportivas.
- K) A non remisión en tempo e forma das gravacións dos partidos por parte dos equipos naquelas competicións que impliquen tal obriga.
- L) As modificacións efectuadas en canto aos terreos de xogo, datas e horarios dos encontros, sen a autorización da FEGABA.
- M) A introdución ou ignición de petardos ou bengalas ou outro obxecto perigoso dentro do recinto deportivo cando non lles causen dano físico ás persoas asistentes ao encontro.
- N) A non presenza do adestrador no encontro.

O) A vulneración de carácter leve de calquera outra norma de competición aprobada legal ou estatutariamente.

Art. 51.- O club que devolva o recibo bancario mensual que se presente o cobramento nos cinco primeiros días de cada mes, deberá facelo efectivo nos sete días seguintes a súa devolución. De non realizalo así se poñerá en coñecemento dos órganos disciplinarios federativos que acordarán a suspensión dos encontros necesarios en que haxa de participar o club infractor. Estes partidos declararanse por perdidos ata que no efectúe aquel pagamento con recargo adicional do 20% sobre a totalidade do seu importe.

De igual xeito, mentres non se fagan efectivos os recibos devoltos o club non poderá dar ningunha alta nos seus equipos.

Este pagamento deberá realizarse con, cando menos catro días de anticipación á data de disputa dos encontros cuxa suspensións sexas decretadas por aquel motivo.

A reincidencia na falta de pagamento dos recibos dos gastos federativos, motivará que os órganos disciplinarios federativos poidan obrigar, sen prexuízo de posterior liquidación, ao aboamento de ditos recibos de todos os encontros restantes da competición. No caso de non facelo, o equipo podería ser descualificado desta, segundo as circunstancias que concorresen en cada caso.

No caso de que se presentase un recibo por importe incorrecto a un club, poderá negarse ao pagamento da diferenza, pero deberá depositarse en todo caso no prazo antes indicado o importe que considere correcto, sen que haxa lugar a recargo. Pero poderase descontar do recibo o 50% deste ao cargo do colexio de árbitros que o expida, se se estimase por órgano respectivo da Federación que era incorrecto, como sanción por producir a cuestión.

No caso de que durante o transcurso da temporada a Federación Galega de Baloncesto acordara a execución do “Depósito Inicial” dalgún club, o citado club poderá ser descualificado da competición ou ben se suspenderán os encontros e daránselle por perdidos co resultado 2-0, en tanto no repoña dito “Depósito Inicial”.

Art. 52.- O equipo que se retire dunha competición por puntos, unha vez comezada esta, será sancionado coa non participación en ningunha outra competición dentro da mesma

tempada e co descenso á última das categorías que organice a federación ou a delegación zonal á que pertenza.

Ademais da citada sanción, os órganos disciplinarios federativos disporán a anulación de todos os encontros que realizase o equipo retirado e impoñerlle unha multa de ata 1.000 euros; así mesmo, fixará a indemnización que deba satisfacerlles aos demais clubs participantes na competición.

Art. 53: Será sancionado con multa de ata 1.000 euros o club que incumpra a obriga imposta polo Artº 115 do Regulamento Xeral da FGB, e non remitira as licenzas oficiais antes das datas sinaladas nas bases de competición.

CAPÍTULO TERCEIRO

Das infraccións ás Normas Xerais, deportivas e das Sancións.

Art. 54.- Son infraccións ás normas xerais deportivas as accións e omisións non comprendidas no capítulo anterior, que sexan contrarias ao disposto na Lei do deporte e disposicións de desenvolvemento, nos estatutos e regulamentos da FEGABA e en calquera outra disposición federativa.

Poderán ser responsables de ditas infraccións os membros do equipo arbitral, oficiais de mesa, directivo/a, dirixente/a deportivo/a, xogador/a, adestrador/a, delegado/a, auxiliar de equipo, ou, en xeral, calquera persoa que interveña ou participe en ditos actos.

Art. 55.- Consideraranse como infraccións MOI GRAVES, que se sancionarán con suspensión de un a seis anos e multa de 1.000 ata 3.000 euros e poderán comportar a inhabilitación a perpetuidade atendendo á gravidade do acto cometido e ao prexuízo causado, as seguintes:

- A) A intervención en feitos conducentes á obtención dun resultado predeterminado nun encontro.
- B) Os abusos de autoridade.
- C) O quebrantamento de sancións impostas. O quebrantamento apreciarase en todos os supostos en que as sancións resulten executivas. O mesmo réxime aplicaráse cando se trate do quebrantamento de medidas preventivas. Especificamente, considéranse inmerso na infracción de quebrantamento de sanción imposta aos adestradores/as que,

estando suspendidos, dirixan reiteradamente ao seu equipo dende as bancadas e outra zona da instalación deportiva.

D) O comportamento reiterado e gravemente atentatorio á disciplina ou non gardar o respecto debido ás autoridades deportivas.

E) A non participación por parte dos equipos dos clubs nas competicións oficiais que lle corresponden pola súa categoría e polos requisitos establecidos pola Federación.

F) A promoción, incitación, consumo ou utilización de substancias e grupos farmacolóxicos prohibidos e métodos de dopaxe non regulamentarios, destinados a aumentar artificialmente as capacidades físicas das persoas deportistas ou a modificar os resultados establecidos das competicións.

G) A negativa a se someter aos controis esixidos por persoas e órganos competentes, ou calquera acción ou omisión que impida ou perturbe a correcta realización dos anteditos controis.

H) As declaracións públicas de directivos/as, técnicos/as, adestradores/as, árbitros/as e deportistas ou socios/as ou outras persoas vinculadas aos clubs que inciten os seus equipos ou ao público á violencia.

I) A organización de actividades ou competicións deportivas oficiais de carácter autonómico, sen a regulamentaria autorización.

Art. 56.- Consideraranse infraccións graves, que se sancionarán con suspensión de dous meses ata un ano e multa de 500 ata 1.000 euros, as seguintes:

A) O incumprimento das ordes e instrucións federativas ditadas polos órganos competentes.

B) Intervir en feitos consistentes en estimular con cantidades en metálico avaliáveis en diñeiro ou recompensas a compoñentes dun terceiro equipo para a obtención dun resultado positivo. Sancionarase así mesmo o receptor das devanditas cantidades.

C) O exercicio de actividades públicas ou privadas declaradas incompatibles coa actividade ou función deportiva desempeñada.

D) As manifestacións públicas a través dun medio de comunicación social nas que se atente á ética deportiva das persoas incluídas neste regulamento ou se lles ofenda gravemente.

E) As condutas que atenten de maneira grave e reiterada á disciplina, ou non lle garden o respecto debido ás autoridades federativas.

ART. 57.- Consideraranse infraccións leves, que se sancionarán con suspensión de ata dous meses e multa de ata 500 euros, as seguintes:

- A) O incumprimento das ordes e instrucións ditadas polos organismos competentes cando se produzan por negligencia ou descoido imprudente.
- B) As manifestacións públicas desconsideradas ou ofensivas cara a persoas ou entidades integradas na organización federativa.
- C) As manifestacións públicas contrastadas que descualifiquen a actuación de xogadores/as, adestradores/as, árbitros/as, directivos/as e clubs.

Art. 58.- Sen prexuízo das accións que poidan exercerse ante a xurisdición competente, o club que incumpra as obrigas respecto dos seus xogadores/as ou adestradores/as, dando lugar á desvinculación destes co club mediante o oportuno expediente ante os órganos disciplinarios federativos, non poderá cubrir tales baixas durante o resto da tempada de que se trate.

Art. 59.- Sen prexuízo das accións que poidan exercerse ante a xurisdición competente, o incumprimento das obrigas por parte dun xogador/a ou adestrador/a respecto dun club, que dea lugar á desvinculación destes, mediante o oportuno expediente ante os órganos disciplinarios federativos, determinará a imposibilidade do/a xogador/a ou adestrador/a para actuar noutro club durante o resto da tempada de que se trate, á parte da obriga que deba cumprir co club.

Tales expedientes só poderán iniciarse por pedimento dos clubs ou de tales xogadores ou adestradores como partes interesadas e lexítimas. Todo o relacionado neste capítulo considérase como materia disciplinaria.

CAPÍTULO CUARTO

Do Procedemento.

SECCIÓN PRIMEIRA

Disposicións xerais

Art. 60.- De conformidade co disposto nos artigos 100 ao 108 dos Estatutos da Federación Galega de Baloncesto, é aos órganos disciplinarios desta, o Comité Galego de Competición e o Comité Galego de Apelación, a quen lles corresponde exercer a potestade disciplinaria.

Baixo a súa disciplina, extraída do presente Regulamento Disciplinario, estarán todas as persoas, físicas ou xurídicas, sinaladas no seu art. 2, e, en definitiva, todas aquelas vinculadas e que pertencen oficialmente á FEGABA.

Art. 61.- O Comité Galego de Competición estará formado por un Xuíz Único e un secretario pertencente á Secretaría Xeral da FEGABA.

O Xuíz Único será o encargado de coñecer e resolver os casos que se propoñan, segundo a súa competencia, de acordo co presente Regulamento Disciplinario e cos Estatutos e outras normas da FEGABA.

O Comité Galego de Competición terá o seu secretario pertencente á Secretaría da FEGABA que asistirá ao Xuíz Único con voz e sen voto, redactará a acta das sesións e dará traslado dos acordos.

Art. 62.- O Comité de Apelación da FEGABA estará integrado por un Xuíz Único, que será auxiliado por un secretario pertencente á Secretaría da FEGABA.

O Xuíz Único de Apelación será competente para resolver os recursos que se podan interpoñer contra os actos e resolucións do Comité de Competición e calquera outra función que determinen as normas federativas.

O Comité de Apelación poderá realizar probas para un mellor prover se estima que a instrución do Comité de Competición é insuficiente.

Art. 63.- O nomeamento de secretario do Comité de Apelación recaerá sempre sobre unha persoa distinta á que exerza tales funcións no Comité de Competición, sexa zonal ou da Federación Galega, ao igual que calquera membro destes.

Art. 64.- As sesións dos órganos contemplados nos artigos anteriores terán lugar cando menos semanalmente durante o período en que se disputen competicións e cantas veces o esixa a competición ou situación correspondente.

Art. 65.- O Comité Galego de Competición e o Comité de Apelación, ademais das establecidas, poderán ditar as normas necesarias para o seu propio funcionamento.

SECCIÓN SEGUNDA

Subsección Primeira

Normas comúns.

Art. 66.- Unicamente poderán impoñerse sancións disciplinarias en virtude do expediente instruído para o efecto segundo os procedementos regulados no presente Regulamento.

Os procedementos poderán ser iniciados de oficio ou a instancia de parte lexítima.

Se, unha vez iniciado o procedemento sancionador, o infractor recoñece a súa responsabilidade, este poderase resolver deseguido coa imposición da sanción que proceda.

Art. 67.- O Comité Galego de Competición levará un rexistro de sancións impostas, para os efectos da posible apreciación das causas modificativas da responsabilidade e do cómputo dos prazos de prescrición de infraccións e sancións.

Art. 68.- Calquera persoa ou entidade cuxos dereitos ou intereses se poidan ver afectados pola substanciación dun procedemento disciplinario poderá presentarse neste, tendo, dende a súa admisión, e para os efectos de notificacións e de proposición e práctica da proba, a consideración de parte interesada.

Art. 69.- As providencias e resolucións recaídas nos procedementos disciplinarios, que lles afecten ás persoas interesadas nestes, serán comunicados a aquelas no prazo máis breve posible, co límite máximo de dez días hábiles, a través dos medios cotiás de notificación ou de acordo coas normas establecidas na lexislación do procedemento administrativo común.

Art. 70.- As notificacións deberán conter o texto íntegro da resolución coa indicación de se é ou non definitiva, a expresión das reclamacións ou recursos que procedan, órgano ante o que houbese de se presentar e prazo para interpoñelas, indicando o medio e a dirección ao que pode dirixirse, o medio de pago e número de conta, de ser necesario, así como, no seu caso, os beneficios por pronto pago e penalizacións por demora.

As providencias non requiren ser motivadas, sen prexuízo de que podan selo para unha mellor comprensión.

As resolucións dos expedientes sancionadores deberán ser motivadas nos casos previstos na lexislación do Estado sobre procedemento administrativo común e cando así o dispoña a normativa vixente en materia deportiva.

Subsección Segunda

Procedemento ordinario.

Art. 71.- O procedemento ordinario será aplicable para a imposición de sancións por infracción das regras de xogo ou da competición, respecto das cales se require a intervención inmediata dos órganos disciplinarios federativos para garantir o normal desenvolvemento das competicións.

Art. 72.- O Comité Galego de Competición resolverá con carácter xeral sobre as incidencias que se reflectan nas actas dos encontros e nos informes complementarios que emitan membros do equipo arbitral, que deberán remitirse ao comité dentro das 48 horas naturais seguintes a partir das 09:00 h do primeiro día hábil despois da finalización da xornada. Igualmente, resolverán sobre as reclamacións, alegacións, informes e probas que presenten as partes interesadas dentro do mesmo prazo, sobre calquera incidente ou anomalía, con motivo ou ocasión dun encontro ou competición.

Unha vez transcorrido o dito prazo, o Comité de Competición non admitirá máis alegacións que as que requira expresamente.

Art. 73.- Para tomar as súas decisións o Comité de Competición terá en conta necesariamente a acta do encontro, os informes arbitrais adicionais á acta, e do/a delegado/a federativo/a e o do/a informador/a designado/a polo propio Comité, se houber. Ditas actas ou informes gozarán de presunción de autenticidade e veracidade, sen prexuízo de admitir proba en contrario.

Así mesmo, teranse en conta tamén as alegacións das partes interesadas e calquera outra testemuña que considere válida.

Será tamén admisible calquera outro medio de proba do que se poida dispor en prazo.

O Comité de Competición gozará de plena liberdade na apreciación e valoración de todas as probas practicadas. Para isto poderá realizar de oficio cantas actuacións resulten necesarias para o exame dos feitos.

Art. 74.- Considérase evacuado o trámite de audiencia a partes interesadas mediante a entrega da acta do encontro ao club ou equipo e ao transcurso do prazo establecido no artigo 72 do presente regulamento.

Se existise calquera dos informes aos que se refire o artigo 73, o Comité de Competición, antes de adoptar a resolución, dará traslado do contido dos anteditos informes ás partes interesadas, para que, no termo de 48 horas naturais dende a súa recepción, manifesten o que estimen oportuno.

Art. 75.- O Comité de Competición, cando se dean os requisitos previstos no artigo 16 do presente Regulamento Disciplinario, poderá impoñer suspensións provisionais ou ben adoptar calquera outra medida preventiva, mediante a oportuna resolución que deberá ser notificada ás partes interesadas, na que se fará constar o recurso procedente contra esta, que será o de apelación ante o Comité Galego de Apelación na forma e prazo establecidos nos artigos 90 e seguintes do presente Regulamento.

As suspensións provisionais computaranse como parte das sancións definitivas que se poidan impoñer no seu día.

Art. 76.- Os prazos establecidos nos artigos anteriores poderán ser modificados se os encontros corresponden a un torneo ou competición que se dispute en días consecutivos ou baixo sistemas de xogo especiais, en cuxo caso o Comité Galego de Competición establecerá o procedente mediante as oportunas instrucións que deberán ser coñecidas polos equipos e árbitros actantes.

Art. 77.- Nas resolucións do Comité de Competición farase constar o feito constitutivo da falta, artigos de aplicación e sanción acordada. Nas resolucións indicaranse os recursos que contra estas procedan, así como os órganos e prazos en que haberán de se interpoñer.

Serán comunicadas por escrito ás partes afectadas, directamente ou a través da delegación que corresponda, a través do medio cotiá de relación.

En calquera caso os prazos computaranse a partir do día seguinte hábil ao da recepción das notificacións por calquera dos medios sinalados no parágrafo anterior.

Subsección Terceira

Procedemento extraordinario.

Art. 78.- O procedemento extraordinario será aplicable pola imposición de sancións polas infraccións ás normas deportivas xerais reguladas nos artigos 54 a 59, incluídos, do presente Regulamento Disciplinario, sen prexuízo do disposto no Regulamento de competicións respecto da desvinculación entre club e xogador/a ou adestrador/a.

Art. 79.- O procedemento iniciárase por providencia do Comité de Competición, que poderá ser ditada dos seguintes xeitos:

- A) De oficio, xa sexa por iniciativa propia ou virtude de denuncia motivada.
- B) Por solicitude de parte interesada.
- C) Por requirimento do Comité Galego de Xustiza Deportiva.

Art. 80.- Ao ter coñecemento dunha suposta infracción das normas deportivas, o Comité Galego de Competición poderá acordar a instrución de información reservada antes de decretar a providencia en que se decida a incoación do expediente ou, de ser o caso, o arquivo das actuacións.

Art. 81.- Cando se acordase o arquivo das actuacións, expresaranse sucintamente as causas que o motiven e resolverase o procedente en relación ca persoa denunciante se o houber.

Art. 82.- A providencia que inicie o expediente disciplinario conterá o nomeamento de instrutor e a cuxo cargo correrá a tramitación deste, e do secretario, que asistirá a aquel na dita tramitación.

A providencia de incoación deberá serlle notificada ao inculpado.

Art. 83.- 1.- Ao instrutor e ao secretario sonlles de aplicación as causas de abstención e recusación previstas na lexislación do Estado para o procedemento administrativo común.

2.- O dereito de recusación poderá ser exercido polos interesados no prazo de tres días hábiles, que comezarán a contar a partir do día seguinte ao que teñan coñecemento da correspondente providencia de nomeamento ante o Comité Galego de Competición, que deberá resolver no termo de tres días.

3.- Contra a resolución que se dite non se dará ningún recurso, sen prexuízo da posibilidade de alegar a recusación ao interpoñer o recurso administrativo ou xurisdiccional, segundo proceda, contra o acto que poña fin ao procedemento.

Art. 84.- 1. En calquera momento posterior á iniciación do procedemento, o Comité Galego de Competición poderá adoptar, mediante resolución motivada ditada de oficio ou tras a moción previa razoada do instrutor, as medidas provisionais que estime oportunas para asegurar a eficacia da resolución que puidese recaer no expediente.

2. As medidas provisionais deberán suxeitarse ao principio de proporcionalidade, e non poderán adoptarse no suposto de que sexan susceptibles de causar prexuízos irreparables.

3. Contra a resolución na que se adopten as medidas provisionais poderá o interesado recorrer en apelación na forma e prazo establecidos nos artigos 90 e seguintes do presente regulamento.

Art. 85.- 1. O instrutor ordenará a práctica de cantas dilixencias sexan adecuadas para o mellor esclarecemento dos feitos e, tras solicitar informes, determinará as infraccións susceptibles de sanción.

2. Especificamente, o instrutor solicitará os informes que considere necesarios para acordar ou resolver, e concretará o extremo ou extremos sobre os que se solicite o ditame.

Art. 86.- 1. O instrutor ordenará a práctica de cantas dilixencias probatorias poidan conducir ao esclarecemento dos feitos e á determinación das infraccións susceptibles de sanción.

2. Os feitos relevantes para o procedemento e a súa resolución poderán acreditarse por calquera medio de proba, unha vez que o instrutor decida a apertura da fase probatoria, durante un período de tempo non superior a vinte días hábiles nin inferior a cinco, segundo os casos, e comunicáraselles aos interesados con suficiente antelación o lugar e momento da práctica das probas.

3. Así mesmo, os interesados poderán propor, en calquera momento anterior ao inicio da fase probatoria, a práctica de calquera proba ou xuntar directamente as que resulten de interese para a adecuada e correcta resolución do expediente. Contra a denegación expresa ou tácita da proba proposta, os interesados poderán interpoñer reclamación no prazo de tres días hábiles, ante o Comité Galego de Competición, que deberá pronunciarse no termo doutros tres días sobre a admisión ou o rexeitamento da proba proposta, sen que a interposición desta reclamación paralice a tramitación do expediente.

4. As actas subscritas polos árbitros dos encontros, así como as súas ampliacións ou aclaracións, constituirán un medio documental necesario para a proba das infraccións ás regras e normas deportivas.

Art. 87.- 1. Os órganos xurisdicionais federativos poderán, de oficio ou por solicitude do interesado, acordar a acumulación de dous ou máis expedientes sempre que entre estes se dean circunstancias de identidade ou analoxía razoable ou suficiente, de carácter subxectivo e obxectivo, que fixesen aconsellable a tramitación e resolución únicas.

2. A providencia de acumulación seralles comunicada aos interesados no procedemento.

Art. 88.- 1. Á vista das actuacións practicadas, o instrutor propondrá o sobresemento ou formulará o correspondente prego de cargos. Dito prego comprenderá os feitos imputados, as circunstancias concorrentes e as supostas infraccións, así como as sancións que puidesen ser de aplicación.

2. No prego de cargos, o instrutor presentará unha proposta de resolución que lles será notificada aos interesados para que, no prazo de dez días hábiles, manifesten cantas alegacións consideren convenientes en defensa dos seus dereitos ou intereses. Así mesmo, no prego de cargos, o instrutor deberá propor o mantemento ou levantamento das medidas provisionais que se adoptasen.

3. Unha vez transcorrido o prazo sinalado no apartado anterior, o instrutor, sen máis trámite elevará o expediente ao Comité Galego de Competición e engadiralle, de ser o caso, as alegacións presentadas polos interesados.

4.- O instrutor poderá, por causas xustificadas, solicitarlle ao órgano competente para resolver a ampliación do prazo a que se refire o apartado anterior.

Art. 89.- A resolución do órgano competente, o Comité Galego de Competición, pon fin ao expediente disciplinario deportivo e haberá de se ditar no prazo máximo de dez días hábiles, que comezarán a contar dende o día seguinte ao do recepción do expediente polo instrutor. Dita resolución será apelable ante o Comité Galego de Apelación.

SECCIÓN TERCEIRA

Recursos

Dos recursos

Art. 90.- As resolucións disciplinarias ditadas en primeira instancia e por calquera procedemento polo Comité de Competición poderán ser recorridas en apelación ante o Comité Galego de Apelación polas persoas e entidades cuxos dereitos e intereses resulten afectados por aquelas no prazo máximo de dez días hábiles que comezarán a contar dende o día seguinte ao da notificación.

Durante as 48 horas seguintes á recepción da resolución ditada polo Comité Galego de Competición poderase solicitar aclaración desta, caso de estimalo necesario, e, neste caso, suspenderase o prazo establecido para interpoñer o recurso de apelación.

O recurso de apelación interporase ante o propio Comité Galego de Apelación.

Para os anteriores efectos entenderanse como partes afectadas as persoas, clubs e entidades sinaladas no art. 2 do presente Regulamento Disciplinario, interesadas no encontro onde se produciu o feito ou feitos obxecto de sanción.

Art. 91.- En todos os recursos deberá facerse constar:

- A) Nome, apelidos e domicilio da persoa interesada ou da persoa ou entidade que a represente.
- B) O acto que recorre e os feitos que motiven a impugnación, así como a relación de probas que, propostas en primeira instancia en tempo e forma, non fosen practicadas.
- C) Os preceptos regulamentarios que o recorrente considere infrinxidos así como os razoamentos en que fundamente o seu recurso.
- D) A petición concreta que se formule.
- E) O lugar e a data en que se interpón.
- F) O recurso deberá vir acompañando do xustificante do ingreso dun depósito de 30€, o cal será devolto ao interesado no caso de que se estime total ou parcialmente o mesmo.

Art. 92.- Segundo se regula nas normas de disciplina deportiva, a presentación dun recurso non suspenderá o cumprimento da sanción imposta, salvo que o órgano competente para resolvelo o acorde con carácter previo á resolución, de oficio ou por petición de parte interesada no mesmo escrito de recurso, e ata que a dita resolución se produza.

Art. 93.- Na tramitación dos recursos non se poderán practicar outras probas que non fosen as propostas en instancia en tempo e forma e non se practicasen.

Art. 94.- A resolución do recurso confirmará, revocará ou modificará a decisión recorrida, e non poderá, en caso de modificación, derivarse maior prexuízo para a parte interesada, cando esta sexa única recorrente.

Art. 95.- As resolucións do Comité Galego de Apelación serán recorribles no prazo de 15 días hábiles a partir da súa recepción ante o Comité Galego de Xustiza Deportiva, na forma establecida nos artigos 65 e seguintes da Lei do deporte de Galicia.

Art. 96.- O levantamento de sancións no ámbito das súas competencias poderá ser acordado pola Comisión Delegada da Federación Galega de Baloncesto por proposta do Comité Galego de Competición, con carácter autonómico ou zonal, ou excepcionalmente, en casos individuais, con informe previo, en todo caso, da delegación zonal afectada.